



TERTIB ACARA MINGGU PELAJAR
GKPS P.BULAN-RESORT POLONIA MEDAN
Minggu 2 Dob Trinitatis, 21 JUNI 2020
“DILO-DILO MANRAMOTKON TINOMPA”



Live streaming: www.gkpspadangbulan.com/tv
Tata Ibadah: <http://www.gkpspadangbulan.com/tatib>

1. VOTUM – INTROITUS – TONGGO

P. Riap ma hita jongjong!

Ibagas goran ni Naibata Bapa pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen

Ise do na boi tangkog hu dolog ni Jahowa? Ise do na boi jongjong bani ianan-Ni na pansing? Partangan na borsih ampa paruhur na pitah, halak na so mandompakon tonduy ni bani na so margagan, ampa halak na so ra marbija laho manipu. Ia ma na manjalo pasu-pasu humbani Jahowa pakon hapintoron humbani Naibata na paluahkonsi. Haleluya, Haleluya, Haleluya!

K. *(Mandodingkon) Haleluya, Haleluya, Haleluya*

P. Martonggo ma hita.

Ham Tuhan Naibata Sitolusada. Na martumpu do hanami panorang on mangkatahon tarima kasih halani panramotion-Mu bannami. Malas do uhurnami nuan laho pasangpakon goran-Mu Na Pansing in. Dompakkon Ham ma bohi-Mu hu bannami, ase lambin iahapkon hanami habanggalon ni kuasa-Mu paluahkon janah mampargogohi hanami bani ganup na masa bani goluhname. Patotap Ham ma haporsayaonname, halani domma ipadihut Ham hanami parrupe i bani siteanon na dob ibagahkon Ham hubani sagala na porsaya Bamu. Marhitei Jesus Kristus Tuhannami. Amen.

(hundul kuria)

2. DODING HALELUYA NO. 404: 1-2

Ganup ari do in, ronsi tahun hu tahun, Sihol do hudodingkon Goran-Mu.

Ham Tuhan Naibata, sai hupuji do Ham, halani haganup layak-Mu.

Ham arta na harga, poltik hujolom in, humbani na hinan Ham do tong Naibatangkin.

Bonani na dear, ronsi sadokahnin. Panondang na liar, bai ganup na golap in.

Hata-Mu do Tuhan, hupindah i nuan, bahen suluh bai pardalankin.

Pitah Ham hansa in, na mambotoh ijin, Aha na huporuluhon Tuhan.

Ham arta na harga, poltik hujolom in, humbani na hinan Ham do tong Naibatangkin.

Bonani na dear, ronsi sadokah nin. Panondang na liar, bai ganup na golap in.

3. HASASAPANNI DOUSA

- P. Riap ma hita jongjong!
Ibagas unduk pakon toruh ni uhur, martonggo ma hita, sopotkon hita ma dousanta hubani Tuhan Naibata. Ham Tuhan Naibata Bapanami, roh do nuan hanami hu lobei-lobei-Mu mambobankon dirinami. Isopotkon hanami ganup dousa pakon uhur geduk na manrajai uhur ampa pingkirannami. Ham ale Tuhan, tatap Ham ma hanami na doyuk on.
- K. O Tuhan Holong ma Ham
- P. Ham ale Tuhan, mangaku do hanami gok dousa ampa hahurangan do hanami i lobei-lobei-Mu. Hotop do pitah pingkirannami iboan-boan hanami, hurang porsaya do hanami bani kuasa-Mu na boi patorsahon hanami. Holong ma Ham hubannami Tuhan, salpuhon Ham ma hahurangannami in janah pasusi Ham ma hanami ase borsih uhnami mangihutkon Ham.
- K. O Tuhan Holong ma Ham
- P. Buei do hahurangannami huBamu Tuhan, in ma tanggung jawab na dob iondoskon Ham bannami ase iajari janah ipodahi hanami niombahnami. Gati ope lang idalankon hanami in, gap do homa hanami bani horjanami mambaen hurang perhatiannami hubani sidea na patut sipardiateihononnnami. Ham ale Tuhan holong ma Ham bannami.
- K. O Tuhan Holong ma Ham
- P. Hotop do porsayanan hanami bani hapintaronnami sandiri ase hapentaran-Mu. Parlahou pakon pangabaknami pe gati do pataridahkon na botohan hanami marimbang Ham.
- K. O Tuhan Holong ma Ham
- P. Hanami selaku parhorja i tongah-tongah ni kuria in; hanami ma na tang sitalupan mandalankon pangajarion i tongah-tongah ni kuria-Mu marhitei parsahap sonai age pangabaknami. Tapi lape ope ibahen hanami in gabe tanggungjawabnami, hurang ope panogu-noguonnami hubani kuria in. Ham ale Tuhan marpanganju ma Ham bannami.
- K. O Tuhan Holong ma Ham
- P. Hurang ope hanami mambobai uhur ampa pingkirannami romban hubani podah na madear in. Hurang pongkut ope hanami mambasa Bibel pakon marimbagaskon hata-Mu in. Holong ma Ham ale Tuhan hubannami pardousa on
- K. O Tuhan Holong ma Ham”
----- *saat teduh* -----
- P. Tangar anjaha haporsayai hita ma Hata ni Naibata, bagah-bagah pasal hasasapan ni dousa. “Martuah ma halak na dob sinasap panlanggaronni, na dob nirungkub dousani. Martuah ma halak anggo seng ihira Jahowa bani hajahaton.” (Psalmen 32:1-2).

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhan na bayu. Hasangapon ma bani Naibata i babou!

K. Amen.

(hundul kuria)

4. DODING HALELUYA NO. 299:1+3

Domma i hopkop Tuhanku tonduyhu ase maluah tonduyhu tongtong
Domma isasap Tuhanku dousangku ase manggoluh tonduyhu tongtong
Malas uhurhu megah uhurhu lao pasangapkon Tuhan bai goluhkon.

Nai ma hapeni holong ni ateiNi hita pe patut marholong tongtong

Jolom Hata-Ni, sai jalo Tonduy-Ni, ulang be ganggang humbai Tuhan in.

Ulang be holang martonggo hu Bani! Ai do gogohta bai horja-Ni in.

Ulang mabiar, ulang be gobir, lao mantaluhon gogoh ni setan in!

Tenger uhurta hubani Tuhanta; ihasomani do hita tongtong.

5. HATA NI NAIBATA: PODAH HUBANI NIOMBAH (Podah 2:1-11)

P. Ale anakku, ango ijalo ho hatangku anjaha iparimbagaskon ho titahku

K. Tangi ho bani hapentaran anjaha itareihon ho uhurmu dampak pangarusion

P. Tongon, ango dilo-dilo ho bani pangarusion, ipamaling ho soramu mangindo hauhuron

K. Anggo ipindahi ho ai songon na mangindahi pirak, anjaha itorihi ho ai songon bani arta na ponop

P. Jadi arusanmu ma biar dampak Jahowa, anjaha jumpah ho habotohon pasal Jahowa

K. Ai Jahowa do sibere hapentaran, humbani pamangan-Ni do roh habotohon pakon hauhuron

P. Ia do pasirsir pangurupion bani halak parpintor, Ia do gantar bani halak na bujur marparlahou

K. Ijaga do pardalan ni uhum, anjaha iramotkon do dalan ni halak na daulat Bani

P. Jadi arusanmu ma hapintoron pakon uhum, habonaron pakon sagala dalan na dear

K. Ai roh ma hapentaran hubagas uhurmu, anjaha mantin ma habotohon bani tonduymu

P. Uhur hapantason ma manramotkon ho, anjaha pangarusion siparjaga bam.

P+K. Amen

6. DODING HALELUYA NO. 207: 1-2

Bere ham ma hatorangan, hapentaran mangarusi Hata-Mu
ampa mata na mangidah pakon uhur na mambotoh dalan-Mu
Ase tongtong mandompakkon, bohi-Mu hanai mardalan
ase igomgomi tonduy-Mu hanami.

Sai ajari Ham hanami, na tongtong ibagas haotoon in.

Sai porsaya ma hanami, Ham tumang do hagoluhan nami in

Roh dokahni, roh dohorni, uhur-Mu bai uhurnami

Sai sadalan pakon Hata-Mu hanami

7. HATA HAPORSAYAON

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on.

Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius Latus, iparsilangkong, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma Ia mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani Kuria parsadaan na mapansing in, parsoraan ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen. *(hundul kuria)*

8. ACARA KHUSUS

- Mambasa Tonah ni Pimpinan Pusat GKPS
- Pemberian Apresiasi Bani Niombah na Berprestasi
- Tingting Pakon Tonggo Pangapition

9. DODING HALELUYA NO. 399: 1-2

Tubuhan poyon-poyon, i tonggah juma in, Manggargar manuk-manuk, bai parasaran niin

Marbagei pakon ihan, ibagas laut in, Ge tinompa na legan, seng targorani in Ganupan iparmudu Tuhanta Naibata, Lobihan iparmudu ganupan hita da Sonai ge halayakon, ibere do homa, Talup hatahononta, diatei tupa ma

Ibere do panondang mataniari in, Bulan ampakon bintang panondang borngin in Udan logouni ari, pagantih soluk in, Sonin ma ganup tingki pajagar tanoh in Ganupan iparmudu Tuhanta Naibata, Lobihan iparmudu ganupan hita da Sonai ge halayakon, ibere do homa, Talup hatahononta, diatei tupa ma

10. AMBILAN: 3 Musa 25:1-13 (Pdt. Dr. Jan Hotner Saragih)

Marolob-olob halani parduli bani na legan

Anggo mangihutkon harosuh ni dunia on, boi do tubuh ahap na marolob-olob atap na marmalas ni uhur tentuni halani na adong do na mambahen, khususni bani aha na

iharosuhkon uhur. Boi do gabe tubuh pangahap na marolob-olob halani dapotan na sinura ni uhur; tambah pansarian pakon buei alasan na legan na gabe hasomalan na adong i tongah-tongahta. Bani jolma na orientasi malas ni uhur ampa olob-olob ni humbani ukuran ni dunia on, tentu ni haganupan on igoki halani na dob manjalohon aha na itawarhon duni aon hubani. Padahal anggo mangihutkon hisap ni dunia on, seng adong ukuran sungkup atap salosei. Tapi marbeda pakon aha na somal bani dunia on, teks ni ambilan na ijalo hita minggu on justru mambere pangajarion pasal sumber ni olob-olob halani na sirsir mampardiateihon hasoman na legan. Jahowa do na patugahkon parentahni hubani bangsa-Ni marhitei hajongjongan ni Musa sanggah i dolog Sinai. Iparentahkon Naibata do sada aturan baru bani bangsa ai ase ra sidea mardingat pasal tahun Sabat ampa Tahun Parolob-oloban na dob ipasirsir Naibata hubani sidea. On ma homa na laho sihorjahononni bangsa ai, anggo marianan ma sidea bani tanoh na dob ipadankon Tuhan hubani sidea. Tangkas do ipatugah Naibata aturan na sihol horjahonon ni sidea. Mamungkah humbani na mangetong, domma sadia dokah sidea mangkorjahon tanoh ni sidea. Anggo domma gok onom tahun, maningon marsaran ma tanoh ai bani tahun papituhon (ay. 3-4). Seng adong be aktivitas na marpardomuan pakon na marjuma atap marsuan, mansamot ampa mangimas, martidah pakon horja na legan. Haganupan on domma ihorjahon sadokah onom tahun. Bani tahun na papituhon, ipaturut do tanoh ai laho patubuhkon suan-suanan janah anggo adong pohon anggur atap bona ni pohon na legan; ipaturut ma ai mangihutkon aturan ni Naibata. Nini ayat 6, gogoh ni tanoh sadokah tahun parsaranan Sabat ai, gabe sipanganon ni bangsa rap pakon jabolon ampa pinahan na adong bani sidea; ai age sadia bahat otik ni hasil juma ai. Aturan on sedo pitah marlaku bani tahun papituhon, tapi dihut do homa age bani tahun papituhon hali pitu, aima tahun Sabat songon na sinobut bani ayat 8. Lang pitah ai, maningon ipapasing do homa tahun ai marhitei pambahenan na mader. Ipahata ma tarompit laho mamungkah horja na mader ai.

Sada hal na unik bani ambilanta on aima ojur ni Tuhan Naibata na mamarentahkon ase papansingkon tahun palimapuluhkon marhitei na lang be marpariama janah mulak ma sidea haganup bani parbagianan ni. Tahun parolob-oloban itandai marhitei na mulak hubani parbagianan ni bei janah lang be mangkorjahon juma ni. Aha do maksudni teks on?

Anggo mangihutkon parentah ni Naibata hubani bangsa ai, ibahen Tuhan in pe na igoran tahun Sabat ampa tahun parolob-oloban laho patangkashon pasal kuasa ampa idop ni uhur ni Naibata. Marhitei na lang marhorja bangsa ai bani juman sidea bani tahun na papituhon, laho patugahkon paboa sidea maningon manggoluh ibagas na mangandalhon Naibata. Lang adong kuasa ampa gogoh na legan na boi mambobai ampa pasirsirhon na porlu bani bangsa ai. Haganupan ai laho patugahkon ase bangsa Israel ulang sompat mangondoskon pangarapan ni goluhni hubani gogoh ni tanoh in. Tapi agepe lang marhorja sidea bani juma ni bei, mampu do Tuhan in mambere na porlu bani sidea. Bani

na legan, ijon Naibata sihol patubuhkon ahap na perduli hubani bangsa ai dompak hasoman ampa tinompa na legan. Bani tahun Sabat ampa tahun Parolob-oloban ai, ninging sirsir do sidea saling berbagi janah saling perduli antara na sada pakon na legan.

Mardingat bani ganup na masa i tongah-tongata sondahan on, pesan ni ambilanta minggu on lambin mampargogohi hita ase sirsir mandalankon harusuh ni Tuhan in. Buei do humbanta na sanggah mandompakkon hamaholon ampa paruntolon pangkorhon ni Covid-19 na adong ope i tongah-tongahta. Anggo mangihutkon harusuh ni Tuhan, ramotkon hita ma hasomanta sonai age tinompa na legan ase hunjai jaloonta ma malas ni uhur. Gabe tubuh ma ahap na marolob-olob i tongah-tongahta. Sadalan hujai, songon na sinobut paboa minggu on aima minggu pelajar banta. Pesan penting na sihol hatahonon ijon aima pasal porlu ni gereja mambere pangajarion hubani ganup kuria in tarlobih hubani niombahni kuria in ase tetap marpangarapan hubani Naibata. Sidea ma holi na dihut mandalankon aturan ni Naibata marhitei na tetap marpangarapan bani kuasa ni Tuhan in janah ra homa marbagi hubani hasoman ampa tinompa na legan ase hunjai dapotan ma hita bani pasu-pasu ni Tuhan bani goluh on. On ma tanggungjawabta na gabe dilo-dilo hubanta laho manramotkon tinompa na legan. Selamat hari Minggu janah selamat Minggu Pelajar ma hubanta haganupan. Amin !

11. GALANGAN (Prb: Parambilan)

P. Paima iondoskon hita galanganta, tangar hita ma lobei Hata ni Naibata na gabe onjolan banta laho manggalang, aima na tarsurat bani: 1 Kronika 16:29, “Bere ma bani Jahowa hamuliaon ni goran-Ni, boan ma galangan, anjaha roh ma nasiam hu lobeiNi! Sombah ma Jahowa marpakeian na mapansing!”
Sonari ondoskon hita ma galanganta!

12. TONGGO PAKON DODING GALANGAN

P. Riap ma hita jongjong!
Ham Tuhan Naibata, Bapanami, pardear layak janah na unjah hu bannami. Tarimakasih ma hatahononami hu Bamu, halani tongtong do ipasu-pasu Ham goluhname. Domma ihasomani Ham hanami janah ipasu-pasu Ham horjanami das hubani sadari on. Sonari, ibagas malas ni uhur roh do hanami mangondoskon buah ni horja na dob pinasu-pasuMu in gabe galangan hatarimakasihon pakon puji-pujiannami hu Bamu. On pe sai jalo Ham ma galangannami on, bahen hasangapon ni goranMu janah mambahen lambin marhataridahan harajaonMu i dunia on. Ibagas goran ni AnakMu, Jesus Kristus Tuhannami, jalo Ham ma tonggonami on. Amen.

P +K. (*Mandodingkon*) Haleluya No. 281:5
Bamu o Tuhan, manambah au on;
Bamu ganupan na dong bangku on;

Seng bulih be sirang na rapat Bamu;
Martuah sai sonang, na roh hu Bamu.

13. TONGGO PANUTUP

P. Ham Tuhan Naibata simada kuasa ampa hagogohon. Domma italuhon Ham hagogohon ni dousa, sibolis ampa hamateian marhitei Jesus Kristus, janah domma isuruh Ham Tonduy Na Pansing marianan ibagas hauhuronami, mambahen boi hanami mardilo Bapa hu Bamu. Paruhuri Ham ma hanami, ase lambin ihagoluhkon hanami haluahon na dob ilayakkon Ham anjaha boi hanami das hubani hamardekaon na sintong selaku anak-anak ni Naibata. Jalo Ham ma hanami pakon tonggonami marhitei Jesus Kristus Tuhan ampa Sipaluah, na manggoluh pakon na markuasa riap pakon Ham ibagas hasadaon ni Tonduy Na Pansing, Naibata Sitolusada sonari ronsi sadokah ni dokahni. Amen

14. TONGGO HAM BAPANAMI

P Ham Bapanami na i nagori atas. Sai na papansing ma Goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou.

K. (*Mandodingkon*) Ai Ham do simada harajaon, pakon hagogohon ampa hasangapon sadokah ni dokahni. Amen.

15. PAINGKATKON

P. Laho ma nasiam, janah “Ulang ma surut ringgas ni uhurnasiam, hinsah ma ibagas tonduy, sirsir ma mambalosi Tuhan in” (*Rom 12:11*)

16. PASU-PASU:

P. Jalo ham (hita) ma pasu-pasu humbani Tuhan Naibatanta:
Ipasu-pasu anjaha iparorot Tuhan Naibata ma ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakkon Tuhan Naibata ma bohi- Ni hu bamu (hu banta) janah ipasorap ma damei-Ni bani tonduymu (tonduyta bei). Amen.

P+K. (*Mandodingkon*) Amen...Amen....Amen.

